

CONCLUSIÓNS DO PRIMEIRO RELATORIO: GALEGUIDADE

Reunida a Comisión de traballo do IX Pleno do Consello de Comunidades Galegas para o debate do Relatorio: “Galeguidade”, presidida por D. Enrique Repiso Muriedas acordouse a aprobación por unanimidade das seguintes conclusións:

1.- Ante o debate de si e ou non necesaria unha nova Lei da galeguidade acordase manter a actual -Lei de Recoñecemento da Galeguidade- e os cambios que compre facer instrumentalizáranse mediante o desenvolvemento regulamentario da mesma, correspondendo ao Pleno do Consello, tal e como actualmente está constituído, e co instrumento da Comisión Delegada, propoñer á Xunta de Galicia dita regulamentación.

2.- A Comisión Delegada como órgano representativo da galeguidade debe ter a máxima representatividade e operatividade, aberta a posibles modificacións e melloras, para unha maior eficacia.

Propóñense as seguintes modificacións:

Reiterase a necesidade de actualizar o regulamento interno de funcionamento da Comisión Delegada para unha maior eficacia nas súas actuacións e xestión, nos seguintes aspectos:

a) Representatividade e composición da Comisión Delegada

Proponse manter a distribución de centros con galeguidade recoñecida e centros colaboradores.

b) No referente á elección dos representantes da Comisión Delegada, expóñese facer unha distribución por áreas en España para asegurar unha maior representatividade.

Propóñese a apertura dun período electoral, ao menos de tres meses, antes da celebración do Pleno, onde os candidatos dean a coñecer as súas propostas e programas a través da portal web “galiciaaberta.com”.

c) Períodos de representatividade e rotación dos membros da Comisión Delegada

Expúxose establecer un límite á reelección dos membros da Comisión Delegada que se establece en dous períodos consecutivos como máximo.

d) Reunións da Comisión Delegada

Considerase necesario engadir mais reunións para os membros das tres áreas onde se tratarán temas específicos que serán expostos na reunión conxunta de carácter anual.

e) Encomendase á Comisión Delegada a elaboración dos relatorios que se van a presentar no Consello, así como sometelos a súa aprobación coa suficiente antelación. Así mesmo, dita Comisión terá que facer unha memoria anual informando do traballo desenvolto e darllo a coñecer a todos os centros galegos.

f) Instase a dotar de recursos a Comisión Delegada para que desenvolva o cometido que ten encomendado.

g) A Comisión Delegada debe velar polo cumprimento dos acordos adoptados tanto no seu seo como no do Consello de Comunidades Galegas e que eses acordos se teñan en conta pola Xunta de Galicia.

h) No procedemento de concesión ou denegación do recoñecemento Galeguidade aos centros debese consultar a Comisión Delegada

3.- Difundir a cultura galega mediante o desenvolvemento de actividades e distintas iniciativas socioculturais que profundicen nos nosos valores, tradicións e na nosa lingua.

4.-As Comunidades Galegas de España solicitan o seu dereito a acollerse aos beneficios da política de retorno.

5.- Solicítase da Xunta de Galicia a realización dun estudio das colectividades galegas e da súa capacidade, artellando métodos e recursos apropiados para favorecer a fusión das entidades dunha mesma área de influencia. No caso de que estas fusións en determinadas entidades non sexan posibles se deben apoiar institucionalmente.

6.- Promover por parte dos centros galegos a participación activa da mocidade no traballo e na dirección das entidades galegas coa finalidade de garantir a súa supervivencia.

7.- Os procesos de integración e unión de entidades debe partir dunha primeira fase de achegamento mediante a coordinación de actividades e de servizos conxuntos, como fase previa para avanzar nun proceso común de integración

8.-Instase á Xunta de Galicia para que promova e apoie a creación de entidades educativas no exterior, creando así un espazo educativo galego que permita a educación dentro da galeguidade na diáspora.

9.- É unha demanda constante da emigración galega e, xa exposta en anteriores Consellos, a necesidade de dar a coñecer en Galicia a historia da nosa emigración, ben a través do ensino regulado ou ben ao marxe do mesmo.

10.- Instar a Xunta de Galicia a que amplíe o número de Delegacións no exterior para facilitarlle aos galegos o exercicio dos seus dereitos e as posibles prestacións ás que poidan acceder.

11.- Para poñer fin ao cuestionamento existente sobre a participación dos residentes no exterior nos procesos electorais, debese garantir o exercicio do voto en urna.